

解州全志卷之九 安邑縣

人物

國朝

王道成崇正癸未進士浙江金衢道處家孝友居官清正力矯沽名

王冕運庠貢生汾州府訓導順治己丑殉難詳運志

張譽由邑庠改運庠家貧力學至性過人詳運志

呂崇烈崇正癸未進士官至禮部左侍郎德性沉靜學有本源接曹于汴之傳倡明理學鄉會典試雅稱得人講學宏運書院至老不輟

解州全志

卷之九 安邑縣 人物

一

丁期昌前明癸未進士初任揚州推官調黃州舉廉官
第一詳運志

張鵬翥運庠貢生由教諭陞湖廣新化知縣歷任邵陽
臨武操守廉潔詳運志

王度舉人陝西安塞知縣讀書力行有古人風居官清
苦歸里後訓士課子多著述歿無以殮邑侯趙公憐
而賻焉

馬光裕順治丁亥進士官至禮部郎中持躬接物和雅
溫恭官銓曹考核公明陳明終養事母孝潛心濂洛
諸書與理學孫徵君魏環極二先生往復質辨一以

躬行實踐爲主所著有止齋集子祚錫載錫禹錫俱敦行力學

馬光啟運庠生順治壬辰進士累官戶部員外郎歷有政聲詳運志

謝檜齡康熙戊午舉人授內閣中書改內邱知縣有政績行取主事詳運志

喬宏德康熙壬戌進士令安東詳運志

劉士琨貢生初任寧鄉訓導擢四川內江縣知縣陞直隸灤州知州以疾致仕詳運志

景四維康熙乙未進士初任新喻縣後改涇縣商民德解州全志

卷之九

安邑縣

人物

二

之詳運志

相斗南前明舉人雷白知縣慷慨有意氣明末流寇起出家貲給城守城賴以完任雷白時請免越境夫役歸里能爲地方陳利弊祀名宦鄉賢

李忱字恂九順治戊子拔貢知西安縣吏事明敏舉卓異遷鞏昌府同知擢金華守節晏飲省刑罰聞逆之亂嚴守孤城四十五日夜卒獲保全以勞卒

劉迪穀順治戊戌進士初任太和縣知縣補岷縣天性剛直生平無脂韋態兩司民牧俱以清著

周訓成順治己亥進士選庶吉士辛丑同考後除江西

南瑞道改廣西右江道又補上江督糧道俱有惠聲
致政歸著見山園草

祁斌康熙癸卯舉人四川新都縣知縣八年政成陞延
慶知州里民立碑誌感詳運志

丁廷樞由運學登第天性孝友歷知鳳陽徽州二府一
介不取詳運志

景應熊康熙乙丑進士浙江東陽縣令廉靜寡欲撫軍
張公鵬翮器重之邑旱荒民多逋賦憲檄催督甚急
應熊終不忍敲朴陽民建祠樹碑以志不忘告歸後
四壁蕭然以載籍自娛絕迹公庭邑侯曾公旭嘗曰

解州全志

卷之九

安邑縣

人物

三

先生今之法真也名可得而聞人不可得而見其歎
服如此所著有憶椿錄讀禮撮要讀儒宗旨諸書

劉樞廕生授雲南建水知州清正愛民民為立碑建祠
解組歸好學不倦詩文皆有法度

劉桓廕生歷任湖廣督糧道叅政威惠並用著有治越
全書攀轅錄建牙虎伏集蓬萊集

王尹方字鶴汀斌子選庠生壬子癸丑聯雋進士歷官
內閣學士禮部侍郎清度雅望典試得人詳運志

康行儻字鏗霜甲戌進士初仕韓城後擢工部主事晚
年詩酒自娛多所撰著詳運志

何遠康熙戊辰進士爲獲嘉令擢禮部主政陞員外郎
詳運志

劉喬齡乙丑進士初令江陰詢民疾苦方施行尋以憂
去服闋補武進益加矜慎徵糧立分限法革除羨耗
漕務悉罷陋規出入平準歲省耗米萬餘石編審以
籍爲定平徭均役惟從民便公餘校藝手定甲乙有
蘭陵課士錄贈炙人口祀鄉賢

孫超康熙庚午舉人令興化時值旱荒超設法救饑民
賴以活庚子分校南闈所拔多知名士年九十一卒
張弼例貢仕至河南淮徐道饒才能詳運志

解州全志

卷之九

安邑縣

人物

四

馬謙益以選拔登賢書令青浦綽有政聲卒於官所著
有讀書錄孝子傳

劉樛以父永瀨廕歷松江安慶知府累陞雲南布政使
除金銀等礦積弊禁豪猾鹽茶營窟內外數十年勤
慎稱職

彭人瑛善屬文尤工詩歌康熙辛丑進士初牧易州輕
徭薄稅以治績擢保定守護臬篆雪冤理滯積案一
清遷清河道副使陞湖南按察使持法寬平破觚斲
雕吏民安之殿撰汪應銓爲之傳

宋緝聲好學數奇不獲一衿訓課子孫致通顯封鴻臚

少卿爲人篤實忠厚貴而不驕慷慨樂施親族待舉
火者數家創立試院號並與賢會給士子資斧長
子在詩長孫鑿成進士次子在書暨諸孫鑿鈔鉅悉
登賢書

葛鳳翔性孝友甘貧嗜學耿介廉方工詩文書法贈禮
部員外郎祀鄉賢

葛健字健菴鄉賢鳳翔長子以孝聞友於弟儁至老彌
篤愛姪德潤如已出教督成名弟儁字樸園亦以孝
敬聞健鍵戶讀書儁經營於外所獲悉歸兄不私一
錢佃儻有大畧樂施不倦晚年肩修縣學已八袞餘

解州全志

卷之九

安邑縣

人物

五

矣猶躬親檢點費省工固當事重之健子德溥武定
同知儁子德潤進士歷官侍御兩任學政健儁並封
如德潤官

人物

明

馬驥貢生直隸安肅教諭性敦篤教勤敏及門多顯宦

宋怡舉人任陝西寶鷄訓導博學明道遠近師之

張普圓永樂中以孝被旌

景繡正統間輸穀一千石賑濟全敬輸穀五百石俱蒙欽獎又李福榮亦輸穀賑饑

王徵天順壬午舉人山東汶上令廉方爲民所信服

馬鵬弘治戊午舉人霍邱知縣文章華而有理著琴譜

解州全志

卷之九

安邑縣

人物

六

曹應選庠生家酷貧兄應聘以貢入都病歿應選間關千里備極艱辛負兄骨歸呂宗伯匾其門曰遠負隰哀張世則贈詩有遊魂時繞還家夢白骨猶懷鞠子情之句

周官正德丙子舉人令鎮安成童時父爲擇婚將娶女以疾改容寢陋父欲別娶公曰命也竟娶之

呂完正德間父歿廬墓常有數狼伴之縣令疑其事黎明詣墳驗視果如人言

喬安侍父伯泰疾躬親湯藥衣不解帶者百餘日父卒哀毀廬墓斷葷酒負土成墳父嗜桃李於塋傍種百

餘株甫三尺而花實母卒廬墓如前塋中穀生雙穗
桃李秋榮

王鳳母卒廬墓有白狼伏於塋鳳不懼一日狼越墻去
陷隙中鳳以手扶出狼再四廻顧自後時來伏塋歷
三年

李瑛廬父墓三年絕甘旨擇隙種瓜備時祭孟冬瓜猶
生人以爲孝行所感

張光射事親孝晨興必請所食父遊飲處常預授錢酒
肆少遠則攜家膳從之昆弟有無與共妯娌化焉事
長睦族並有仁讓聲

解州全志

卷之九

安邑縣

人物

七

景嘉會學優行高事親孝以弟嘉柱乏嗣病故日夕悲
慟竟卒

景于崗庠生事孀母克盡子職建坊旌表

馬煒王衷粹皆庠生善事繼母鄉評推重衷粹又義助
修城

景蕭性至孝父疾篤日夜悲號潛剖腹割肝作羹進父
遂愈

姚良卿貢生醇樸渾含橫逆不校任寧津令其弟良能
貢生亦以長者重於鄉

楊瑄少孤貧拾金還主孝事孀母嘉靖戊子舉人官齊

河教諭遷新安令冰蘖自持卒於官囊橐蕭然士民念之

王承家孝事孀母撫養孤甥恩義並至祀鄉賢

景東生舉人嚴氣正性持身無過教子二人孫五人皆登科祀鄉賢

吳從周嘉靖甲子舉人陝西延安府同知居鄉服官俱以長厚稱子養淳養溫養源養洵養洽相繼登科人謂媲美燕山

馬邦瑞萬歷癸酉舉人已丑進士行人司行人坦懷無城府與人語肝膽盡披有過不自隱

解州全志

卷之九

安邑縣

人物

八

劉允寬庠生父歿遺腹三月生侍孀母四十年竭力承歡母嗜瓜豆身任桔槔母指拘攣晝夜哀禱得愈第五子廉民亦庠生遊曹于汴門母喪廬墓著六言訓正須辨無無齋行世

劉近寬有孝行遇生忌斷酒肉悲哀不輟凡十五年後由吏員任京倉大使

吳養溫父從周任延安同知時溫同四弟養洵赴任拾遺金三百卽還其人有還金碑記後溫由舉人亦爲延安同知

曲應鵬萬歷間貢任汾州訓導敦篤務朴不悅浮華文

品益著

王承蛟性孝友萬歷間弟承印毆斃人命法當抵蛟泣謂父曰印無嗣兒現有二子安忍以兩門獨留一脉乎遂自刎以抵償後印果得不絕

張君賜貢生分訓廣寧陞廣州學正署鷄澤築一廬不染引年歸里歿之日環堵蕭然

楊吉士性耿直時號楊公平

劉春力農課子周急解紛鄉人高其義氣

吳琨庠生性至孝父母歿廬墓三年

郭國泰山海關都司辭官養親撫姪如子庚辰大祲出

解州全志

卷之九

安邑縣

人物

九

粟數百石以賑族黨

郝本彰庠生事繼母撫異母弟孝友備至家貧樂道少年卽棄舉業博覽羣書勸人爲善鹽政武陵楊公贈句云陋巷一生顏氏樂清風千載伯夷貧鹽政張公匾其門曰石渠鴻寶其後浩然長往不知所之

馬之偉庠生孝友真誠人稱爲古君子教子光裕光啟皆成進士祀鄉賢

謝名揚例貢素行孝友坦易和厚祀鄉賢

姚蕭例貢以父母年高終身不仕鹽政喻公旌曰孝子

第

丁應美例貢雅志文學克敦孝友義方垂訓慷慨樂施
長子期昌成進士曾孫廷樾官翰林廷植以武舉任
臺灣副將人以爲厚德之報

李鼎新武舉好義樂施侍養孀親不赴會闈

呂萬里贈侍讀學士性孝友囊無私蓄與弟妹共之

曹良良曹中丞子汴曰吾族老僕曹寧其子良良垂髫
時以搖箕爲生每得毫釐則爲父母具美味稍長備
工其父母不乏酒肉爲作良良歌曰曹寧夫婦病且
老有子良良行孝道苦肋竭力得毫釐奉養雙親常
溫飽我雖峩冠爲朝臣睹此美行感懷抱世上豈乏

解州全志

卷之九

安邑縣

人物

十

峩冠人上天下地能論討妻羅子綺愁不足不爲父
母添布襖嗟爾良良是吾師願爾多壽多財寶

董克賢天啟甲子舉人學堪持世孝可傳家

楊柱以舉人授固安教諭性敏學博德重鄉黨

王世相例貢延川知縣好讀書嫻詩詞醫卜諸藝所交
皆當世名人

劉光溥明末寇變有翼城高商寄以五百金閱二年還
之封識宛然

王第贈郎中舊志稱其事親有道教子有方

同知曲璫同知張蒞主事張淳甫知縣王一中同知張

良知知縣李茂春知縣竇師偁庠生張啟蒙行人任
正斗庠生宋登雲知縣楊舒聲縣丞郭進祿吏目張
綱甫教諭喬溥恩教諭周學思歲貢邵三畏御史張
集知縣丁應觀主事劉席民教諭王畿旬貢生楊時
和訓導王治傳俱詳運志

國朝

王价順治丙戌舉人工草書義助修城

景良贈知縣孝友溫恭與物無競延名師以課子禮敬
有加子一元儲元四維天錫相繼登科五子體元亦
列賢宮

解州全志

卷之九

安邑縣

人物

士

喬攀桂丁繩武俱庠生天性純孝李金章木匠陳奇略
亦以孝著

王九韶歲貢輕財重義嘗路拾百四十金待其主而還
之周卹匱乏多不計償鄉人有貢士在可依賴貢士
死誰借貸之歌

劉天佑例貢初仕戶部員外郎遷刑部郎中再任長沙
守有政績不畏疆禦能化其俗蒞任二載以母老告
歸

謝象枋河南陳留縣丞職司河漕不辭勞瘁盡革私弊
署陳留篆告歸杜門不出所著有樂山園稿甘泉賦

張昭舉人授中書天性孝友樂善好施修名賢祠築漏澤園人皆義之

張淳舉人事母孝爲人清謹性嗜學好摹二王書得其神似

吳凌遠由舉人任平定學正博學能文工於詩古著有夢筆樓集

周冕副貢力學不倦善於誨人從游多知名之士

張天錫以將材從征臺灣廈門有功任福建漳浦鎮城守遊擊左都督

王登文康熙甲子武解元雅好詩文深於左史晚年專

解州全志

卷之九

安邑縣

人物

三

工草書有顛素風骨人爭藏之弟廷樞以孝友稱

郭纘汾增生潛心經學敦尙實行居父母喪水不入口者七日歉歲設廠煮粥以活流亡

薛輝性極孝父病劇割左臂以療之又有王祥者亦割股醫母俱旌匾

張岷字望思雍正丙午舉於鄉居家孝友義重任恤銓期已及高尙不赴州縣延修邑乘甫脫稿旋歿士論惜之

庠生郭用凝民人任思禹俱竭力事親教孚鄉黨

郭宗汾治家謹嚴居鄉寬厚間有橫逆輒閉戶不校其

人謝過終若爲不知者子瑄玠孫二成恩榮九成俱貴

許其毅庠生性孝友父享百齡歿孺慕不衰生平調族睦隣葺廟宇造橋梁實心任事子愨登賢書

陶暹庠生少孤事孀母備極色養友愛昆季

劉宴性孝友嗜學未遇訓子斫由舉人歷官玉環同知有治績少子燁亦工詩文入黌序出繼子炯進士館選悉承家教

張士璉爲諸生時貧甚僦不羈雍正甲辰進士慷慨好施始終弗倦

解州全志

卷之九

安邑縣

人物

十三

張凝祐年十九遭兵火一家流散祐捐軀尋親曲盡孝養又懷金贖弟歸多方保全性慷慨焚券散粟無吝色始終弗倦

郭允張郭允宜俱庠生兄弟友愛數十年如一日內外無間言

康行儔州同性至孝事孀母承歡順志囊無私財

王緒統州同少孤孝事孀母撫育孤姪各至成立

謝松齡庠生穎異超羣手不釋卷博極羣書善文章工吟咏著述最富堂弟楠齡歲貢亦善屬文

丁鳴羽庠生立身狷介教授生徒口不言貧母目失明

百計醫之乃愈

王修德賦性磊落年十四以孝聞任長沙知縣在任三年士民懷之

張份事母孝任貴州黔西知州值歲歉捐貲代完逋欠終養歸里

楊擇善孝事繼母色養兼至又建宗祠設祭田歲稔出粟賑饑子孫相繼游庠

張侂弱冠亡父孝奉孀母敬事仲兄性好施雍正乙卯夏無麥在官平糶不繼出麥數百石以佐之人服其義

解州全志

卷之九

安邑縣

人物

古

牛士遇張董村人兄士通嘗遠出不知所往久不歸士遇千里求之不避險阻數遇虎馴伏不傷誓不見兄不還五年始與兄俱歸子澤與兄湛析箸數年矣湛貿易失利負逋不能償澤變產紓兄憂湛亦友於澤人以爲有父風澤之子問仁中乾隆癸未進士

舉人萬敷典

贈知州

康宏業解元康宏猷教諭郭用光貢

生郭用賢

贈知州

李琮生知縣張弼拔貢南二謙訓導

路應元舉人張鏐廩生張奎知州李秉儉司務王釐方歲貢王餘佑知縣張存恒中書張存誠知縣王曾淑舉人楊林峰舉人郭邵例貢張鶴知縣李閻權舉

人李楞例貢張京俊訓導李秉恭州判和綬輝廩生
李地渥庠生李延淪傳俱詳運志

解州全志

卷之九

安邑縣

人物

五